



Jacob par le conseil de sa mere, fait en sorte que la benediction qu'Isaac auoit promis, & pensoit donner à Esäu, luy est donnee.

IS A A C estant deuenü fort ancien, & sa veüë estant en telle sorte abbaissée, qu'il ne voyoit plus goutte, commanda à son fils Esäu d'aller à la chafse, & luy apprester à souper: luy promettant, qu'apres il luy donneroit sa benediction. Rebecca qui ay moit Jacob, le fit reuestir des meilleurs habits d'Esäu, luy mit autour du col & des mains des peaux de Chevreau, afin qu'il semblast velu comme Esäu. En cette façon fit qu'il presenta à Isaac son pere, vn Chevreau qu'elle auoit appresté. Isaac ayant touché Jacob, & estimant que ce fust Esäu qui luy auoit fait manger de la venaison qu'il auoit prise, luy donna sa benediction, & pria Dieu qu'il le fist heureux en toute sorte; qu'il luy donnast abondance de toutes choses; le rendist formidable à toutes Nations; & qu'il fust Seigneur & maistre sur tous ses freres; & que ceux qui le beniroient fussent benits, & que ceux qui le maudioient fussent maudits. Tout aussi-tost arriua Esäu, lequel voyant que son frere luy auoit soustrait la benediction qui luy estoit promise, se lamentoit amèrement. Dequoy ayant pitié Isaac, luy donna vne autre benediction, & luy promit qu'il seroit excellent en l'Art militaire; que neantmoins il seroit sous la domination de son frere, de l'obeïssance duquel enfin il se retireroit.